

四庫全書

史部

欽定四庫全書

史部

景定建康志卷四十九

五十

詳校官監察御史臣沈孫璉

檢討臣德生覆勘

總校官檢討臣何思鈞

校對官中書臣張曾炳

謄錄監生臣錢雋選

欽定四庫全書

景定建康志卷四十九

宋 周應合 撰

治行傳

東漢史崇字伯勤家世杜陵建武中累遷右將軍青冀
二州刺史加驃騎將軍封溧陽縣侯天下既寧詔遣公
侯皆就封崇褰帷蒞政求民之瘼治尚寬簡不威而化
畋漁相遜桑梓成陰年七十九贈司空使持節徐兗二
州刺史謚曰壯侯子孫因家溧陽遂為縣人奕世濟美

里俗呼崇為史祖廟貌至今存焉子顯字叔升襲爵年七十謚曰文顯子茅字德英元初三年襲爵除尚書遷侍中轉鎮西將軍雍州牧宰治得宜寬猛相濟聲譽播于歌謠年六十七謚曰頃茅子治字君普襲爵除河內太守轉司隸校尉雍州刺史羽儀當世骨鯁一時年八十一謚曰戴治子澤字素廣襲爵除左郎將轉上郡太守遷御史大夫正色立朝貴戚斂手年七十一謚曰節澤子鉉字安鼎建元四年襲爵改封蘭山侯遷冀州刺

史宗本抑末章程具舉年八十五謚曰康鉉子藻字睿
文精究庶事明察枉直下無謗言 史嵩字仁基崇之
裔孫仕吳為平越中郎將蒼梧鬱林二郡太守封撫陵
侯宗裔孫又有曰懿者吳征南將軍隴西太守曰爽者
晉冠軍將軍北中郎將五兵尚書從吳歸晉本國大中
正零陵郡公曰韶者交州屬國都尉陽羨侯曰楚者晉
建安太守安吉伯曰晃者晉輕車將軍南蠻校尉長沙
太守曰璜者晉蒼梧太守曰隱者晉尚書侍御史曰淵

者晉尚書左民郎江陽太守秭縣侯曰諒者晉琅邪王
府主簿平蘇峻桓溫有功封常安侯曰琬者晉散騎常
侍輕車將軍都亭侯曰陵者晉左中郎將御史中丞豫
章太守曰援者晉輕車將軍西中郎將 史光字伯朗
崇裔孫仕晉中書侍郎遷侍中皆稱其職光子雅字叔
安晉散騎常侍中書令陳留太守雅子輝字季明晉積
石將軍輝子疇字伯倫晉豫章太守疇子憲字景法晉
主待以殊榮再不應命制書責謂起為尚書左民郎轉

建安太守興利除害舉善黜惡朝廷嘉之封山陰縣侯
在郡卒年七十二贈江州刺史 史實亦崇之裔以溧
陽人知溧陽縣事蓋偽吳大復二年也被牒云溧陽洛
橋鎮遏使知茶鹽榷麴務銀青光祿大夫檢校刑部尚
書魚御史大夫上柱國史實譽馳鄉里才達變通禦邊
徼以多能緝兵戎而有術加以洞詳稼穡善撫蒸黎賦
輿深見其否臧案簿窮知其利病以久無宰字尤藉招
攜俾分魚領之榮庶養新歸之俗儻聞報政別議酬勞

差魚知溧陽縣事

潘乾字元貞陳國長平人楚太傅潘崇之末緒也察廉除溧陽長布政優優令儀令色矜孤顧老重義輕利推泮宮之教反決拾之禮興修學宮宗懿招德既安且寧大侯用張發彼有的雅容載閑鐘磬縣具于胥樂焉詳見校官碑其銘有云翼翼聖慈惠我黎蒸貽我潘君平茲溧陽彬文赴武扶弱抑彊餘辭謫泐不可讀

晉劉超字世瑜琅邪臨沂人少有志元帝渡江為中書

舍人處身清苦衣不重帛家無儋石之儲所賜皆固辭
帝不奪其志尋出補句容縣令推誠待物為百姓所懷
入為中書通事郎

孫謙字長遠為句容令清謹強記號為神明

唐楊於陵十八擢進士調句容縣主簿器量方峻進止
有常度節操堅明終不失其正時人尊師之德宗立遷
戶部尚書以左僕射致仕

白季康太原人為溧水令溫恭誠信為官貞白嚴重見

知于郡守流譽於朋僚既歿邑人祀之至今不廢從姪
居易嘗誌其墓宰相敏中季康之子也

岑仲休為溧水令兄仲羲為金壇令弟仲翔為長洲令
皆有治績宰相語本道巡察御史無遺江東三岑

馬之純字師丈金華人也弱冠登隆興進士第與南軒
東萊講貫精詣天文地理制度之學靡不洞究為三山
法曹與上官爭是非民之全活者衆有欲薦公中都官
輒謝之其介峭恬退類此喬文惠公行簡葛端獻公洪

皆橫經執弟子禮慶元間以承議郎主管江東轉運司
文字廉平公正克相其長持畫婉婉邁邁維多建康留
守節度使吳公琚有幾日不來春便晚開盡桃花之句
蓋與公倡酬也公篇章吟詠初不苦思而意已獨至嘗
作金陵百詠用唐律體樞密潛齋王公墊稱其事核辭
質義正趣遠興亡理亂之迹盛衰因革之故瞭然在目
覽之者足以慨六代之遺風垂萬世之法成同於詩史
滿秩授通判靜江軍府事不赴卒於家所著書解中庸

大學說周禮隨釋講義春秋編年圖豫章沅芷雜著傳
於時世號野亭先生後六十年公之孫光祖一再開闢
建康臨民蒞事壹以公為法民益德之思其祖而建祠
事焉以孫資政恩贈太傅誥詞曰禋于宗類于帝駿惠
方行非其身在其孫慶源甚遠爰敘祿典加賁泉局具
官光祖故祖故官之純尚友古人潛心大業聯名鴈塔
韓歐為同榜之後游講道牛谿房魏多及門之高第富
有茂陵之藏藁僅終康海之題與惟嗇于前遂昌厥後

藏祀既陳於駢享分膺首逮於麟符肆繇孤卿晉陟帝
傳祭則受福誕霈燔柴之恩沒而有知對越面槐之寵
李朝正互見耆舊傳

耆舊傳

紀瞻字思遠丹陽秣陵人也祖亮吳尚書令父陟光祿
大夫瞻少以方直知名吳平徙家歷陽郡察孝廉不行
後舉秀才尚書郎永康初州又舉寒素大司馬辟東閣
祭酒其年除鄢陵公國相不之官明年左降松滋侯相

太安中棄官歸家與顧榮等共誅陳敏召拜尚書郎與榮同赴洛在塗共論易太極瞻曰昔庖犧畫八卦陰陽之理盡矣文王仲尼係其遺業三聖相承共同一致稱易準天無復其餘也夫天清地平兩儀交泰四時推移日月輝其間自然之數雖經諸聖孰知其始吾子云矇昧未分豈其然乎聖人人也安得混沌之初能藏其身於未分之內老氏先天之言此蓋虛誕之說非易者之意也亦謂吾子神通體解所不應疑意者直謂太極極

盡之稱言其理極無復外形外形既極而生兩儀王氏
指向可謂近之古人舉至極以為驗謂二儀生於此非
復謂有父母若必有父母非天地其孰在榮遂止至徐
州聞亂日甚將不行會刺史裴盾得東海王越書若榮
等顧望以軍禮發遣乃與榮及陸玩等各解船棄車牛
一日一夜行三百里得還揚州元帝為安東將軍引為
軍諮祭酒轉鎮東長史帝親幸瞻宅與之同乘而歸以
討周馥華軼功封都鄉侯石勒入寇加揚威將軍都督

京口以南至蕪湖諸軍事以距勒勒退除會稽內史時
有詐作大將軍府符收諸暨令令已受拘瞻覺其詐便
破檻出之訊問使者果伏詐妄尋遷丞相軍諮祭酒論
討陳敏功封臨湘縣侯西臺除侍中不就及長安不守
與王導俱入勸進帝不許瞻曰陛下性與天道猶復役
機神於史籍觀古人之成敗今世事舉目可知不為難
見二帝失御宗廟虛廢神器去晉于今二載梓宮未殯
人神失御陛下膺籙受圖特天所授使六合革面遐荒

來庭宗廟既建神主復安億兆向風殊俗畢至若列宿
之綰北極百川之歸巨海而猶欲守匹夫之謙非所以
闡七廟隆中興也但國賊宜誅當以此屈已謝天下耳
而欲逆天時違人事失地利三者一去雖復傾匡於將
來豈得救祖宗之危急哉適時之宜萬端其可網維大
業者惟理與當晉祚屯否理盡於今促之則得可以隆
中興之祚縱之則失所以資姦寇之權此所謂理也陛
下身當厄運纂承帝緒顧望宗室誰復與讓當承大位

此所謂當也四祖廟開宇宙大業如此今五都燔爇宗廟無主劉石竊弄神器于西北陛下欲高讓于東南此所謂揖讓而救火也臣等區區尚所不許况大人與天地合德日月並明而可以失機後時哉帝猶不許使殿中將軍韓績徹去御坐瞻叱績曰帝坐上應星宿敢有動者斬帝為之改容及帝踐位拜侍中轉尚書上疏諫諍多所匡益帝甚嘉其忠烈會久疾不堪朝請除尚書右僕射屢辭不聽遂稱病篤還第不許時郗鑒據鄒

山屢為石勒等所侵逼瞻以鑒有將相之材恐朝廷棄而不恤上疏請徵之明帝嘗獨引瞻於廣室慨然憂天下曰社稷之臣欲無復十人如何因屈指曰君便其一瞻辭讓帝曰方欲與君善語復云何宗譙讓邪瞻才兼文武朝廷稱其忠亮雅正俄轉領軍將軍當時服其嚴毅雖常疾病六軍敬憚之瞻以久病請去官不聽復加散騎常侍及王敦之逆帝使謂瞻曰卿雖病但為朕卧護六軍所益多矣乃賜布千匹瞻不以歸家分賞將士

賊平復自表還家帝不許固辭不起詔曰瞻忠亮雅正
識局經濟屢以年耆病久逡巡告誠朕深明此操重違
高志令聽所執其以為驃騎將軍常侍如故服物制度
一按舊典遣使就拜止家為府尋卒時年七十二冊贈
本官開府儀同三司謚曰穆遣御史持節監護喪事論
討王含功追封華容子降先爵二等封次子一人亭侯
瞻性靜默少交遊好讀書或手自抄寫凡所著述詩賦
牋表數十篇兼解音樂殆盡其妙厚自奉養立宅於烏

衣巷館宇崇麗園池竹木有足賞玩焉慎行愛士老而
彌篤尚書閔鴻太常薛兼廣川太守河南褚沈給事中
宣城章遼歷陽太守沛國武嘏並與瞻素疎咸藉其高
義臨終託後於瞻瞻悉營護其家為起居宅同於骨肉
焉少與陸機兄弟親善及機被誅瞻卹其家周至及嫁
機女資送同於所生長子景早卒景子友嗣官至廷尉
景弟鑒太子庶子大將軍從事中郎先瞻卒

王諒字幼成丹陽人也少有幹略為王敦所擢叅其府

事稍遷武昌太守初新昌太守梁碩專威交趾迎立陶
咸為刺史咸卒王敷以王機為刺史碩發兵距機自領
交趾太守乃迎前刺史修則子湛行州事永興三年敷
以諒為交州刺史諒將之任敷謂曰修湛梁碩皆國賊
也卿至便收斬之諒既到境湛退還九真廣州刺史陶
侃遣人誘湛來詣諒所諒勅從人不得入閤既前執之
碩時在坐曰湛故州將之子有罪可遣不足殺也諒曰
是君義故無豫我事即斬之碩怒而出諒陰謀誅碩使

客刺之弗克遂率衆圍諒於龍編陶侃遣軍救之未至而諒敗碩逼諒奪其節諒固執不與遂斷諒右臂諒正色曰死且不畏臂斷何有十餘日憤恚而卒碩據交州凶暴酷虐一境患之竟為侃軍所滅傳首京都

陶璜字世英丹陽秣陵人也父基吳交州刺史璜仕吳歷顯位孫皓時交趾太守孫諸貪暴為百姓所患會察戰鄧荀至擅調孔雀三千頭遣送秣陵既苦遠役咸思為亂郡吏呂興殺諸及荀以郡內附武帝拜興安南將

軍交趾太守尋為其功曹李統所殺帝更以建寧爨谷
為交趾太守谷又死更遣巴西馬融代之融病卒南中
監軍霍弋又遣捷為楊稷代融與將軍毛炅九真太守
董元牙門孟幹孟通李松王業爨能等自蜀出交趾破
吳軍于古城斬大都督修則交州刺史劉俊吳遣虞汜
為監軍薛珣為威南將軍大都督璜為蒼梧太守拒稷
戰于分水璜敗退保合浦亡其二將珣怒謂璜曰若自
表討賊而喪二帥其責安在璜曰下官不得行意諸軍

不相順故致敗耳珣怒欲引軍還璜夜以數百兵襲董元獲其寶物船載而歸珣乃謝之以璜領交州為前部督璜從海道出且不意徑至交阯元拒之諸將將戰璜疑斷牆內有伏兵列長戟於其後兵纔接元偽退璜追之伏兵果出長戟逆之大破元等以前所得寶船上錦物數千匹遺扶嚴賊帥梁奇奇將萬餘人助璜元有勇將解系同在城內璜誘其弟象使為書與系又使象乘璜輅車鼓吹導從而行元等曰象尚若此系必有去志

乃就殺之。璜遂陷交趾。吳因用璜為交州刺史。璜有謀策。周窮好施。能得人心。滕修數討南賊。不能制。璜曰：「南岸仰吾鹽鐵。斷勿與市。皆壞為田器。如此二年。可一戰而滅也。」修從之。果破賊。初。霍弋之遣稷、晃等與之誓曰：「若賊圍城未百日而降者。家屬誅。若過百日。救兵不至。吾受其罪。」稷等守未百日。糧盡乞降。璜不許。給其糧。使守。諸將並諫。璜曰：「霍弋已死。不能救。稷等必矣。可須其日滿。然後受降。使彼得無罪。我受有義。內訓百姓外。」

懷鄰國不亦可乎稷等期訖糧盡救兵不至乃納之皓
以璜為使持節都督交州諸軍事前將軍交州牧武平
九德新昌土地阻險夷獠勁悍歷世不賓璜征討開置
三郡及九真屬國三十餘縣徵璜為武昌都督以合浦
太守修允代之交土人請留璜以千數於是遣還皓既
降晉手書遣璜息融勅璜歸順璜流涕數日遣使送印
綬詣洛陽帝詔復其本職封宛陵侯改為冠軍將軍在
南三十年威恩著于殊俗及卒舉州號哭如喪慈親子

威領交州刺史在職甚得百姓心三年卒威弟淑子綏
後並為交州自基至綏四世為交州者五人璜弟濬吳
鎮南大將軍荊州牧濬弟抗太子中庶子濬子湮字恭
之湮弟猷字恭豫並有名湮至臨海太守黃門侍郎猷
宣城内史王導右軍長史湮子馥于湖令為韓晃所殺
追贈廬江太守抗子囧自有傳 陶囧丹陽人也王敦
命為參軍轉州別駕敦死司徒王導引為從事中郎遷
司馬蘇峻之役囧與孔坦言於導請早出兵守江口峻

將至回復謂庾亮曰峻知石頭有重戍不敢直下必向
小丹陽南道步來宜伏兵要之可一戰而擒亮不從峻
果由小丹陽經秣陵迷失道逢郡人執以為鄉導時峻
夜行甚無部分亮聞之深悔不從回等之言尋王師敗
績回還本縣收合義軍得千餘人並為步軍與陶侃溫
嶠等并力攻峻又別破韓晃以功封康樂伯時大賊新
平網維廢弛司徒王導以回有器幹擢補北軍中候俄
轉中護軍久之遷征虜將軍吳興太守時人飢穀貴三

吳尤甚詔欲聽相鬻賣以拯一時之急回上疏曰當今天下不皆荒儉惟獨東土穀價偏貴便相鬻賣聲必遠流北賊聞此將窺疆場如愚臣意不如開倉廩以振之乃不待報輒便開倉及割府郡軍資數萬斛米以救乏絕由是一境獲全既而下詔并勅會稽吳郡依回振卹二郡賴之在郡四年徵拜領軍將軍加散騎常侍征虜將軍如故回性雅正不憚彊禦丹陽尹桓景佞事王導甚為導所昵回常慷慨謂景非正人不宜親狎會榮感

守南斗經旬導語曰南斗揚州分而熒惑守之吾當
遜位以厭此謫回答曰公以明德作相輔弼聖主當親
忠貞遠邪佞而與桓景造膝熒惑何由退舍導深愧之
咸和二年以疾辭職帝不許徙護軍將軍常侍領軍如
故未拜卒年五十一謚曰威四子汪嗣爵位至輔國將
軍宣城內史陋冠軍將軍隱少府無忌光祿勳兄弟咸
有幹用

張閭字敬緒丹陽人吳輔吳將軍昭之曾孫也少孤有

志操太常薛魚進之於元帝言閻才幹貞固當今之良器即引為安東叅軍甚加禮遇轉丞相從事中郎以母憂去職既葬帝強起之閻固辭疾篤優命敷逼遂起視事及帝為晉王拜給事黃門侍郎領本郡大中正以佐翼勲賜爵丹陽縣侯遷侍中帝踐祚出補晉陵內史在郡甚有威惠所部四縣並以旱失田閻乃立曲阿新豐塘溉田八百餘頃每歲豐稔葛洪為其頌計用二十一萬一千四百二十工以擅興造免官後公卿並為之言

曰張閬興陂溉田可謂益國而反被黜使臣下難復為
善帝感悟乃下詔曰丹陽侯閬昔以勞役部人免官雖
從吏議猶未掩其忠節之志也倉廩國之大本宜得其
才今以閬為大司農閬陳黜免始爾不宜便居九列疏
奏不許然後就職帝晏駕以閬為大匠卿營建平陵事
畢遷尚書蘇峻之役閬與王導俱入宮侍衛峻使閬持
節權督東軍王導潛與閬謀密宣太后詔於三吳令速
起義軍陶侃等至假閬節行征虜將軍與振威將軍陶

回兵督丹陽義軍闔到晉陵使內史劉耽盡以一部穀并遣吳郡度支運四部穀以給車騎將軍郗鑒又與吳郡內史蔡謨前吳興內史虞潭會稽內史王舒等招集義兵以討峻峻平以尚書加散騎常侍賜爵宜陽伯遷廷尉以疾解職拜金紫光祿大夫尋卒時年六十四子混嗣閭賤表文議傳於世

樂道融丹陽人也少有大志好學不倦與朋友信每約已而務周急有國士之風為王敦叅軍敦將圖逆謀害

朝賢以告甘卓卓以為不可遲留不赴敦遣道融召之道融雖為敦佐忿其逆節因說卓曰主上躬統萬機非專任劉隗今慮七國之禍故割湘州以削諸侯而王氏擅權日久卒見分政便謂被奪耳王敦背恩肆逆舉兵伐主國家待君至厚今若同之豈不負義生為逆臣死為愚鬼求成宗黨之恥耶君當偽許應命而馳襲武昌敦衆聞之必不戰自散大勲可就矣卓大然之乃與巴東監軍柳純等露檄陳敦過逆率所統致討又遣齋表

詣臺卓性不果決且年老多疑遂待諸方同進出軍稽遲至豬口敷聞卓已下兵卓兄子卬時為敷叅軍使卬求和于卓令其旋軍卓信之將旋主簿鄧騫與道融勸卓曰將軍起義兵而中廢為敗軍之將竊為將軍不取今將軍之下士卒各求其利一旦而還恐不可得也卓不從道融晝夜涕泣諫卓憂憤而死

葛洪字稚川丹陽句容人也祖系吳大鴻臚父悌吳平後入晉為邵陵太守洪少好學家貧躬自伐薪以貿紙

筆夜輒寫書誦習遂以儒學知名為人不訥不好榮利
閉門却掃未嘗交游於餘杭山見何幼道郭文舉目擊
而已各無所言時或尋書問義不遠數千里崎嶇冒涉
期於必得遂究覽典籍尤好神仙導養之法從祖玄吳
時學道得仙號曰葛仙公以其鍊丹秘術授弟子鄭隱
洪就隱學悉得其法焉後師事南海太守上黨鮑玄玄
亦內學逆占將來見洪深重之以女妻洪洪傳玄業兼
綜練醫術凡所著撰皆精覈是非而才章富瞻太安中

石冰作亂吳興太守顧祕為義軍都督與周玘等起兵討之祕檄洪為將兵都尉攻冰別率破之遷伏波將軍冰平洪不論功賞徑至洛陽欲搜求異書以廣其學洪見天下已亂欲避地南土乃叅廣州刺史嵇含軍事及含遇害遂停南土多年征鎮檄命一無所就後還鄉里禮辟皆不赴元帝為丞相辟為掾以平賊功賜爵關內侯咸和初司徒導召補州主簿轉司徒掾遷諮議叅軍千寶深相親友薦洪才堪國史選為散騎常侍領太著

作洪固辭不就以年老欲鍊丹以祈遐壽聞交趾出丹
求為句漏令帝以洪資高不許洪曰非欲為榮以有丹
耳帝從之洪遂將子姪俱行至廣州刺史鄧嶽留不聽
去洪乃止羅浮山鍊丹嶽表補東官太守又辭不就嶽
乃以洪兄子望為記室叅軍在山積年優游閑養著述
不輟著書凡內外一百一十六篇自號抱朴子因以名
書其餘所著碑誄詩賦百卷移檄章表三十卷神仙良
吏隱逸集異等傳各十卷又抄五經史漢百家之言方

伎雜事三百一十卷金匱藥方一百卷肘後要急方四
卷洪博聞深洽江左絕倫著述篇章富于班馬又精辯
玄曠析理入微後忽與獄疏云當遠行尋師尅期便發
獄得疏狼狽往別而洪坐至日中兀然若睡而卒獄至
遂不及見時年八十一視其顏色如生體亦柔軟舉尸
入棺甚輕如空衣世以為尸解得仙云

許邁字叔玄一名映丹陽句容人也家世士族而邁少
恬靜不慕仕進未弱冠嘗造郭璞璞為之筮遇泰其上

六父發璞謂曰君元吉自天宜學道時南海太守鮑靚
隱跡潛遁人莫之知邁乃往候之探其至要父母尚存
未忍違親謂餘杭懸雷山近延陵之茅山是洞庭西門
潛通五嶽陳安世茅季偉常所游處于是立精舍于懸
雷而往來茅嶺之洞室放絕世務以尋仙館朔望時節
還家定省而已父母既終乃遣婦孫氏還家遂攜其同
志徧游名山永和二年移入臨安西山登巖茹芝眇爾
自得終焉之志乃改名玄宇遠游與婦書告別又著

詩十二首論神仙事王羲之造之未嘗不彌日忘歸相與為世外之交自後莫測所終

陶弘景字通明丹陽秣陵人也祖隆王府叅軍父貞孝昌令弘景以宋孝建三年丙申歲夏至日生幼有異操年四五歲常以荻為筆畫灰中學書至十歲得葛洪神仙傳晝夜研尋便有養生之志謂人曰仰青雲覩白日不覺為遠矣父為妾所害弘景終身不娶及長身長七尺七寸神儀明秀讀書萬餘卷一事不知以為深恥善

琴暴工草隸未弱冠齊高帝作相引為諸王侍讀除奉
朝請雖在朱門閉影不交外物唯以披閱為務朝儀故
事多所取焉家貧求宰縣不遂永明十年脫朝服挂神
虎門上表辭祿詔許之賜以束帛敕所在月給茯苓五
斤白蜜二斤以供服餌及發公卿祖之征虜亭供帳甚
盛車馬填咽咸云宋齊以來未有斯事于是止于句容
之句曲山立館自號華陽陶隱居性愛山水每經澗谷
必坐卧其間吟詠盤桓不能已沈約為東陽郡守高其

志節累書要之不至弘景為人圓通謙謹出處冥會心
如明鏡遇物便了言無煩舛有亦隨覺永元初更築三
層樓弘景處其上弟子居其中賓客至其下與物遂絕
唯一家僮得至其所本便馬善射晚皆不為唯聽吹笙
而已特愛松風庭院皆植松每聞其響欣然為樂有時
獨游泉石望見者以為仙人性好著述尚奇異顧惜光
景老而彌篤尤明陰陽五行風角星算山川地理方圓
產物鑿術本草帝代年厯以算推知嘗造渾天象高三

尺許地居中央天轉而地不動以機動之悉與天相會
云修道所須非止史官用是齊末議禪代弘景引圖讖
數處皆成梁字梁武帝既早與之游及即位後恩禮愈
篤書問不絕冠蓋相望帝每得其書燒香虔受帝使造
年厯至己巳歲而加朱點實太清三年也帝手敕招之
錫鹿皮巾後屢加禮聘並不出國家每有吉凶征討大
事無不前以諮詢月中常有數信時人謂為山中宰相
二宮及公王貴要參侯相繼贈遺未嘗脫時多不納受

天監四年移居積金東澗自隱處四十許年逾八十而有壯容仙書云眼方者壽千歲弘景末年一眼有時而方簡文欽具風素召至後堂以葛巾進見與談論數日而去甚敬異之無疾自知應逝逆尅亡日為告逝詩大同二年卒時年八十五顏色不變屈伸如常香氣累日氤氲滿山詔贈太中大夫謚曰貞白先生不娶無子從兄以子松喬嗣所著學苑百卷孝經論語集注帝代年厯本草集注効驗方肘後百一方古今州郡記圖像集

要及玉璽記七曜新舊術疏占候弘景妙解術數逆知
梁祚覆沒預制詩云夷甫任散誕平叔坐論空豈悟昭
陽殿遂作單于宮詩秘在篋裏化後門人方稍出之大
同末士人競談玄理不習武事後侯景篡果在昭陽殿
劉係宗丹陽人也少便書畫為宋竟陵王誕子景粹侍
書誕舉兵廣陵城內皆死敕沈慶之赦係宗以為東宮
侍書泰始中為主書以寒宦累至勳品元徽初為奉朝
請兼中書通事舍人員外郎封始興南亭侯帶秣陵令

齊高帝廢蒼梧明旦呼正直舍人虞整醉不能起係宗
歡喜奉敕高帝曰今天地重開是卿盡力之日使寫諸
處分敕令及四方書疏使主書十人書吏二十人配之
事皆稱旨高帝即位除龍驤將軍建康令永明初為右
軍將軍淮陵太守兼中書通事舍人母喪自解起復本
職四年白賊唐寓之起宿衛兵東討遣係宗隨軍慰勞
遍至遭賊郡縣百姓被驅逼者悉無所問還復人伍係
宗還上曰此段有征無戰以時平蕩百姓安恬甚快也

賜係宗錢帛上欲修白下城難于動役係宗啓謫役在東人丁隨寓之為逆者上從之後車駕出講武上履行白下城曰劉係宗為國家得此一城永明中魏使書常令係宗題答祕書局皆隸之再為少府爵林即位除寧朔將軍宣城太守係宗久在朝省閑于職事武帝常云學士輩不堪經國唯大讀書耳經國一劉係宗足矣沈約王融數百人于事何用其重吏事如此建武二年卒官

梁紀少瑜字幼瑒丹陽秣陵人也本姓吳養于紀氏因而命族早孤幼有志節常慕王安期之為人年十三能屬文初為京華樂王僧孺見而賞之曰此子才藻新拔方有高名少瑜常夢陸倕以一束青鏤管筆授之云我以此筆猶可用卿自擇其善者具文因此適勁年十九始遊太學備探六經博士東海鮑暉雅相欽悅時暉有疾請少瑜代講少瑜既妙玄言善談吐辯捷如流為晉安國中尉即梁簡文也深被恩遇後侍宣城王讀當陽

公為郢州以為功曹叅軍轉輕車限內記室坐事免大
同七年始引為東宮學士邵陵王在郢啟求學士武帝
以少瑜充行少瑜美容貌工藁草吏部尚書到溉嘗曰
此人有大才而無貴仕將拔之會溉去職後除武陵王
記室叅軍卒

陶子鏘字海育丹陽秣陵人也父延尚書比部郎兄尚
宋末為倖臣所怨被繫子鏘公私緣訴流血稽顙行路
嗟傷逢謝超宗下車相訪回入縣詣建康令勞彦遠曰

豈忍見人昆季如此而不留心勞感之兄得釋母終居喪盡禮與范雲隣雲每聞其哭聲必動容改色欲相申薦會雲卒初子鏘母嗜蓴母沒後常以供奠梁武義師初至此年冬營蓴不得子鏘痛恨慟哭而絕久之乃蘇遂長斷蓴味

陶季直秣陵人好學澹于榮利為建安太守政尚清靜百姓便之還遷黃門侍郎辭疾還鄉里就家拜太中大夫梁祖曰梁有天下惜乎不見此人

丁咸序秣陵人耽儒學進修士業授衡陽判官太守賢之

淳于量字思明建康人父文成仕梁為梁州刺史侯景之亂量與王僧辯平之

張松建康人兄悌坐罪當死松及弟景各欲代其死縣以讞上武帝以為孝義特降其死

盧郢金陵人好學有俊才以狀元登第遷至南全守頗著治績

史務滋溧陽人先為溧陽侯累吏勞遷司賓卿天授元年九月進拜納言武后革命詔務滋等十人分行天下雅州刺史劉行實兄弟為侍御史來子詢誣其反詔務滋與來俊臣雜治俊臣言務滋與囚善掩其反狀后命俊臣并治遂自殺

沈恪丹陽人也永定初為宣猛將軍陳霸先謀篡使中書舍人劉師知引恪勒兵入宮衛送梁主如別宮恪排闥見霸先叩頭謝曰恪身經事蕭氏今日不忍見此分

受死耳决不奉命霸先嘉其意不復逼更以盜主王僧志代之

許淹句容人多識廣聞精詁訓與魏模公孫羅名家

劉鄴字漢藩句容人父三復以善文章知名少孤母病廢三復丐粟以養李德裕為浙西觀察使奇其文表為掌書記德裕三領浙西及劔南未嘗不從會昌時位宰相擢三復刑部侍郎宏文館學士鄴六七歲能屬辭德裕憐之使與子共師學德裕既斥鄴無所依去客江湖

間陝號高元裕表署推官高少逸入辟鎮國幕府咸通
初擢左拾遺召為翰林學士賜進士第歷中書舍人遷
承旨鄴傷德裕以朋黨抱誣死海上令狐綯久當國更
數赦不為還官爵至懿宗立綯去位鄴乃申其寃復官
爵世高其義後以禮部尚書同中書門下平章事

許叔牙字延基句容人貞觀時遷晉王府參軍事宏文
館直學士于詩禮尤邃獻詩纂義十篇太子寫附經御
史大夫高智周見之曰欲明詩者宜先讀此

張常洵句容人建中四年父歿廬墓三年墓側產瑞芝
十二莖太守樊泌表奏旌表大和六年姪孫公珽亦以
孝聞

徐鉉字鼎臣廣陵人也十歲能屬文與韓熙載齊名江
南謂之韓徐仕南唐為翰林學士御史大夫吏部尚書
令攝山栖霞寺西來賢亭即其居也王師圍金陵煜遣
鉉朝京師求緩兵太祖以禮遣之後隨煜至京師太祖
責之鉉對曰臣仕江南國亡不能死臣之罪也太祖歎

曰忠臣也以為太子率更令太平興國初直學士院從征太原加給事中出為左散騎常侍坐事貶黜卒年七十六李穆嘗使江南見鉉及其弟錯文章歎曰二陸不能及也錯仕江南為內史舍人而卒鉉好李斯小篆尤得其妙隸書亦工尺牘為士大夫所得皆珍藏之有集三十卷又有質疑論稽神錄行于世

皇朝李華字君儀溧陽人父沒居喪毀瘠盡哀母老得疾廢于牀垂泣憂懼置家事不問專意奉養抱持卧起

進粥藥以至盟悅纖悉必躬必親不出戶庭衣未嘗解帶者十餘年尤篤于友愛同氣五人從容季孟間相親以睦內外無間言有田十餘頃歲水旱誓不一言減縣官租穀翔貴亟發廩平價食其一方虛甑待炊者日以千計大觀政和間蝗數害稼羣飛下其田輒去不食旁畝愧駭且以相告華曰偶然爾勿復言年八十六卒子朝正字治表性剛直不苟于勢利游太學登第歷勅令所刪定官知溧水縣民詣府舉留知府葉參政夢得薦

于朝被召賜對轉一官賜銀緋從民所欲命還溧水陞
辭乞易所得章服封母從之秩滿除太府寺簿母憂服
闋再除勅令所刪定官俄除戶部郎改右司遂權戶部
侍郎奉祠知平江府紹興二十五年卒年六十官至朝
奉大夫

潘祺字長吉溧陽人好學問尚氣節游太學知名與陳
諫議東為心友陳欲獻書闕下過祺謀可否祺曰祺親
老不能與子俱子不可不勉陳意遂決祺性至孝父疾

革露章請于帝願減已筭益父壽父疾果瘳僉以為孝誠所感登第調宣州司戶卒年三十八里人痛惜之

錢戩溧陽人居父憂有少年數人來曰而父在京師逋我金數百萬戩欲償之兄弟有難色且令舉其要戩獨曰大人與人交信厚彼必不我欺且彼謂吾父貸宿鏹吾拒以無左驗辭雖直顧非孝子待親之道卒與之家為瘠不悔元夕家人出觀燈鄰不肖子闖其閭潛入家廟中伺夜將為盜覘識之亟遣守舍僕呼之前攜諭曰

爾良家何為乃至是取一白金合子與之使速去終不語人其子時敏始生有烏鵲銜青銅五銖錢一置庭中香案上識者知其陰德之徵以時敏恩贈奉直大夫時敏字端脩早穎悟讀書一覽即成誦屬文敏速氣岸軒豁勇于為義年十八縣以明經上于郡庠貢辟雍擢上舍第繇大理寺丞遷祕書丞除駕部郎充奉迎兩宮扈從禮儀使司屬官改兵部郎檢察郊祀大禮儀使遷右司郎兼權右史充禮部貢院叅詳官又兼外制拜權工

部侍郎俄權兵部侍郎除敷文閣待制奉祠告老紹興二十三年卒年六十八特贈正議大夫

錢周材字元英溧陽人質重氣和退然似不能言望而接之知其為篤厚君子七歲能屬文鄉試第一登第繇大理司直擢晉安郡王府教授歷遷校書郎著作郎兼教授如故除起居舍人遷刑部侍郎使金還拜中書舍人直學士院兼實錄院修撰兼侍講知常州奉祠孝宗登極以舊學召對便殿留奉內祠兼侍講復為中書舍

人遷給事中兼直學士院母憂服闋屢詔不赴以龍圖閣直學士奉祠告老乾道三年卒年七十二官至朝議大夫

閻產昭字德甫世家建康之江寧徙居溧陽性敏悟遇事繁劇剴決愈精明輕財尚氣義自浙西帥司機宜監六部門遷太府寺丞除倉部郎奉使淮東叅議浙東西帥幕除兩浙運判奉祠乾道九年卒年七十九官至右奉直大夫子晃昴晟晃子一德歷江陰建昌二軍及

秦真二州太守累官至宗正寺簿

刁衍昇州人初仕南唐直清輝閣閱中外章疏甚被親
昵江南既平李昉扈蒙在翰林勉衍出仕因獻聖德頌
于朝乃復故官出宰桐廬凡七年不遷恬澹夷雅多推
尊之太平興國七年上疏言濫刑酷法非律之所載者
望詔天下悉禁止之上覽疏甚悅

秦傳序江寧人也淳化五年賊攻陷嘉戎瀘渝涪忠萬
開八州時傳序為開州監軍力戰而死上降詔嘉獎其

子與泝峽求其父尸至夔州船覆而死人謂父死于忠
子死于孝奏至上嗟惻久之錄傳序次子煦為殿直賜
錢十萬

邵必丹陽人博學有雅望慶厯六年差為編修唐書官
必言史出衆手非是卒辭之

陳克字子高金陵人不事科舉博學專以資為詩呂祉
帥建康辟置為屬

潘溫之字溫甫溧陽人好學王荊公稱為江東書櫃子

登第終絳縣令

宋存字

闕

金陵人也嘗讀吳大帝而下六朝書具詳

歷代興亡成敗之迹南唐時作覽古詩二百章章四句
沿初洎末爛然晷布閱詩者嘉其用心之勤云

朱舜庸字

闕

建康人也好古博雅鄉黨推敬太守聘

為府學正皆尊禮之嘗編金陵事蹟二十年自里巷口
傳至僊佛之書無不研綜舂容大雅餘數萬言慶元中
節度使吳公琚來任留守得其編而契于心乃為之訂

證銓次刻梓以傳目曰續建康志

隱德傳

嚴光字子陵一名遵會稽餘姚人也少有高名與光武

同遊學及光武即位光乃變名姓隱身不見嘗結廬淩

水上

十道四蕃志太平寰宇志皆云淩水縣東南十里
有東廬山有水源三嚴子陵嘗結廬于此帝

思其賢乃令以物色訪之後齊國上言有一男子披羊

裘釣澤中帝疑其光乃備安車玄纁遣使聘之三反而

後至舍于北軍給牀褥太官朝夕進膳司徒霸與光素

舊遣使奉書使人因謂光曰公聞先生至區區欲即詣造迫于典司是以不獲願因日暮自屈語言光不答乃投札與之口授曰君房足下位至鼎足甚善懷仁輔義天下悅阿諛順旨要領絕霸得書封奏之帝笑曰狂奴故態也車駕即日幸其館光卧不起帝即其卧所撫光腹曰咄咄子陵不可相助為理耶光又眠不應良久乃張目熟視曰昔唐堯著德巢父洗耳士固有志何至相迫乎帝曰子陵我竟不能下汝耶于是升輿歎息而去

復引光入論道舊故相對累日共偃卧光以足加帝腹
上明日太史奏客星犯御坐甚急帝笑曰朕故人嚴子
陵共卧耳除為諫議大夫不屈乃耕于富春山後人名
其釣處為嚴陵瀨建武十七年復特徵不至年八十終
于家帝傷惜之詔下郡縣賜錢百萬穀千斛

溧水乃初
隱處富春

乃歸
隱處

晉陶潛字元亮大司馬侃之曾孫也潛少懷高尚博學
善屬文頽脫不羈任真自得為鄉鄰之所貴嘗著五柳

先生傳以自況以親老家貧起為州祭酒後為鎮軍建威參軍事時劉裕為鎮軍將軍潛其屬也揣知裕意即有遯世之志嘗賦詩曰望雲慙高鳥臨水愧遊魚聊且憑化遷終返班生廬謂親朋曰聊欲絃歌以為三逕之資可乎執事者聞之以為彭澤令公田悉令種秫曰令吾常醉足矣素簡貴不私事上官郡遣督郵至縣吏白應東帶見之潛歎曰吾不能為五斗米折腰拳拳事鄉里小人即日賦歸去來辭解印去後徵著作郎不就潛

自以曾祖晉世宰輔不復屈身後代自劉裕稱宋不肯復仕凡著文章所題年月義熙以前則書晉氏年號自永初以來唯書甲子而已宋元嘉中卒年六十三

魯勝字叔時代郡人也少有才操為佐著作郎元康初遷建康令到官著正天論嘗歲日望氣知將來多故便稱疾去官中書令張華遣子勸其更仕再徵博士舉中書郎皆不就

儒雅傳

劉猷字子珪沛郡相人晉丹陽尹恢六世孫也篤志好學博通訓義年五歲聞舅孔熙先讀管寧傳欣然欲讀舅更為說之精意聽受曰此可及也宋大明四年舉秀才除奉朝請不就兄弟三人共處蓬室一間為風所倒無以葺之怡然自樂習業不廢聚徒教授常有數十丹陽尹袁粲于後堂夜集聞而請之指聽事前古柳樹謂猷曰人謂此是劉尹時樹每想高風今復見卿清德可謂不衰矣薦為祕書郎不見用後拜安成王撫軍行參

軍坐事免獄素無宦情自此不復仕袁粲誅獄微服往
哭并致賻助齊高帝踐祚召獄入華林園談語問以政
道答曰政在孝經宋氏所以亡陛下所以得之是也帝
咨嗟曰儒者之言可寶萬世又謂獄曰吾應天革命物
議以為何如獄曰陛下戒前軌之失加之以寬厚雖危
可安若尋其覆轍雖安必危及出帝謂司徒褚彥回曰
方直乃耳學士故自過人敕獄使數入而獄自非詔見
未嘗到宮門上欲用獄為中書即使吏部尚書何戢喻

旨獻笑曰平生無榮進意後以母老闕養拜彭城郡丞
會稽郡丞學徒從之者轉衆除步兵校尉不拜獻姿狀
纖小儒業冠于當時都下士子貴游莫不下席受業當
世推其大儒以比古之曹鄭性謙率不以高名自居之
詣于人唯一門生持胡牀隨後主人未通便坐門待荅
住在檀橋瓦屋數間上皆穿漏學徒敬慕不敢指斥呼
為青溪焉竟陵王子良親往修謁十年表武帝為獻立
館以楊烈橋故主第給之生徒皆賀獻曰室美豈為人

哉此華字豈吾宅耶幸可詔作講堂猶恐見害也未及徙居遇疾卒門人受學者弟子服臨送璫有至性祖母病疽經年手持膏藥漬指為爛母孔氏甚嚴明謂親戚曰阿稱便是今世曾子稱璫小名也年四十餘未有婚對建元中高帝與司徒褚彥回為璫娶王氏女王氏穿壁挂履土落孔氏牀上孔氏不悅璫即出其妻及居母憂住墓下不出廬足為之屈杖不能起此山常有鵠鵠鳥璫在山三年不敢來服釋還家此鳥乃至梁武帝少

時嘗經伏膺及天監元年下詔為瓚立碑謚貞簡先生
所著文集行于世

雷次宗字仲倫豫章南昌人也篤志好學尤明三禮毛
詩隱退不受徵辟宋元嘉十五年徵至都開館于鷄籠
山聚徒教授置生百餘人會稽朱膺之潁川庾蔚之並
以儒學總監諸生時國子學未立上留意藝文使丹陽
尹何尚之立玄學太子率更令何承天立史學司徒參
軍謝玄立文學凡四學並建車駕數至次宗館資給甚

厚久之還廬山公卿以下並設祖道後又徵詣都為築室于鍾山西巖下謂之招隱館使為皇太子諸王講經次宗不入公門乃使自華林東門入延賢堂就業二十五年卒于鍾山子肅之頗傳其業

伏曼容字公儀平昌安丘人晉著作郎滔之曾孫也父胤之宋司空主簿曼容早孤與母兄容居南海少篤學聚徒教授以自業為驃騎行參軍宋明帝好周易嘗集朝臣于清暑殿講詔曼容執經曼容素美風采明帝嘗

以方嵇叔夜使吳人陸探微畫叔夜像以賜之為尚書外兵郎嘗與袁粲罷朝相會言玄理時論以為一臺二絕昇明末為輔國長史南海太守作貪泉銘齊建元中為太子率更令侍講衛將軍王儉深相愛好建武中拜中散大夫時明帝不重儒術曼容宅在瓦官寺東施高坐于聽事有賓客輒升高坐為講說生徒嘗數十百人梁臺建台拜司徒司馬出為臨海太守天監元年卒官年八十二曼容善音律射御風角醫算莫不閑了為周

易毛詩喪服集解老莊論語義

王端朝字季羔本澶淵人過江愛溧陽風土因家焉少以該洽聞年十八舉建康第一後薦太學又為第一登第中博學宏詞科歷太學錄秘書省正字江東帥司機宜除宗正丞提舉兩浙市舶知永州乾道二年卒年四十四官至承議郎

劉岑字季高本吳興人後遷居溧陽天姿英偉學問該貫忠誠許國寬宏愛士有古君子之風文章雄贍字畫

道勁登第累擢至著作郎再使金通判興國軍除湖北
運判辟川陝隨軍轉運使除金部郎累遷權戶侍後出
知太平州池州移鎮江府除刑部侍郎遷戶部侍郎知
信州謫單州團練副使全州安置在全五年移建昌軍
居住又歷九年紹興乙亥冬自便復官奉祠起知泰州
移揚州温州除戶部侍郎車駕親征除御營隨軍都轉
運使奉祠告老除徽猷閣直學士乾道三年卒年八十
一官至左朝散大夫先世葬烏程之杼山故號杼山居

士熙寧中曾祖述字孝叔為御史知雜以忤荆公出知江州司馬溫公折簡與孝叔有道勝名立之語杼山既居溧陽乃以道勝名其堂

崔敦禮與弟敦詩本通州靜海人同登紹興庚辰第愛溧陽山水買田卜居傍舍鑿池池上有讀書之堂扁曰雙桂于湖張孝祥筆也敦禮字仲由歷江寧尉平江府教授江東撫幹諸王宮大小學教授淳熙八年卒官至宣教郎敦詩字大雅性端厚議論疏通知大體博覽彊

記為文敏瞻以詞學自結主知繇秘書省正字除翰林
權直兼宗政殿說書兼權給事中家難服闋除樞密院
編修官學士院權直遷著作郎兼權吏部郎官又兼宗
政殿說書進國子司業改權直學士院拜中書舍人加
侍講直學士院淳熙九年卒年四十四特贈中大夫

李處全字粹伯徐州豐縣人邯鄲公淑之曾孫後遷居
溧陽天資超軼貫串古今忠誠許國寬大好賢慕劉杼
山之為人文章閎肆詩體兼衆長字畫適麗登第繇宗

正寺簿遷太常丞知沅州提舉湖北茶鹽除秘書丞兼
禮部郎官遷殿中侍御史遂除侍御史母憂去朝奉祠
後知袁州處州移贛州未赴改舒州淳熙十六年卒于
任年五十九官至朝議大夫姪柄字子權知無為軍舒
州淳熙四年卒年四十二官至宣教郎

潘彙征字泰初寓居溧陽記問該洽議論醇正宗濂洛
先儒之學四薦三魁登嘉定甲戌第廷對剴切漫塘劉
公宰嘉其志不苟求學行才猷兼備深器重之時杜丞

相範為湖州錄參彙征為儀真郡大學漫塘遂併薦于
朝歷番陽推官安慶教班改宰崑山邑號難治人咸服
其廉平再調繁昌年六十有九自號鶴山狷叟亦近世
人物之賢者也

楊備字修之建平人也慶厯中為尚書虞部員外郎分
司南京上輕車都尉往復道出江上賦百篇二韻命曰
金陵覽古百題詩各註其事于題之下與南唐朱存詩
並傳于時

陳已字九成豫章武寧人也自幼能屬文通周禮及書
春秋亦工于詞賦壯遊金陵從學者衆因家于鎮淮橋
西之竹街受其業者與計偕登上第皆有聞于時晚年
厭科舉業潛心義理之學吟詩著書以自適淳祐中帥
閬嘗薦于朝稱其問學操守窮堅老壯將表章之遽以
疾終有周禮詳說四書講義南窗漫錄傳于世

紀少瑜許叔牙朱存朱舜庸並互見耆舊傳

貞女傳

貞義女史氏溧陽人吳王僚五年伍子胥去楚奔吳中
道而疾乞食溧陽值女子擊繇于瀨水宮中有飯子胥
跪而乞餐女子飯之子胥餐已欲去謂女子曰掩子壺
漿無令其露女子嘆曰嗟乎妾獨與母居三十年自守
貞明不願從適何宜饋飯而與丈夫越虧禮義妾不忍
也子行矣子胥行反顧女子已自沉于瀨水其後闔閭
十年子胥破楚入郢還過溧陽瀨水之上長嘆息曰吾
嘗飢乞食于女子女子飯我遂自沉而亡欲報以百金

而不知其家乃投金水中而去有頃一老嫗悲泣而來或問曰何泣之悲乎曰吾女子往年擊繇于此遇一窮途君子而輒飯之恐事泄自沉于水今聞伍君來不得其償自傷虛死故悲耳人曰子胥欲報百金而不知其

家投金水中而去矣嫗遂取金以歸

李白記云皇唐葉有六聖再造八極

鏡清萬方幽明咸熙天秩有禮自太古及今君君臣臣烈士貞女采其名節尤章可激清頽俗者皆掃地而祠之蘭蒸椒漿歲祀罔缺而茲邑貞義女光靈翳然埋冥古遠琬琰不刻豈前修博達者為邦之意乎貞義女者溧陽黃山里史氏之女也以家溧陽史闕書之歲三十弗移天于入清英潔白事母純孝手柔荑而不龜身溧

擊以自業當楚平王時王虐忠助讒苛虐厥政芟于尚
斬于奢血流于朝赤族伍氏怨毒于人何其深哉子胥
始來奔勾吳月涉星邁或七日不火傷弓于飛逼迫于
昭闕匍匐于瀨渚捨車而徒告窮此女目色以臆授之
壺漿全人自沉形與口滅卓絕千古聲凌浮雲激節必
報之讐雪誠無疑之地難乎哉借如曹娥潛波理貫于
孝道聶舛殞肆槩動于天倫魯姑棄子以却三軍之衆
漂母進飯沒受千金之恩方之于此彼或易耳卒使伍
君開張闔閭傾蕩鄢郢吳師鞭屍于楚國申胥泣血于
秦庭我亡爾存亦各壯志張英風于古今雪大憤于天
地微此女之力雖云為之士亦焉能咆哮烜赫施于後
世耶望其溺所愴然低回而不能去每風號吳天月苦
荆水響像如在精魂可悲備惜投金有泉而刻石無主
哀哉邑宰滢陽鄭公名晏家康成之學世子產之才琴
清心閒百里大化有名主簿扶風竇嘉賓縣尉廣平宋
陟南郡陳然丹陽李濟清河張昭皆有卿材霸畧同事

相協緬紀英淑勒銘道周雖陵頽海竭文或不死其詞
曰繁繁貞女孤生寒門上無所天下報母恩春風三十
花落無言乃如之人擊漂清源碧流素手縈彼潺湲求
思不可秉節而存伍胥東奔乞食于此女分壺漿減口
而死聲動列國義形壯士入郢鞭尸還吳雪
恥投金瀨泣報德稱美明明千秋如月在水

景定建康志卷四十九

欽定四庫全書

景定建康志卷五十

宋 周應合 撰

拾遺

戰國策范環對楚懷王曰且王嘗用名滑於越昧之難
越亂故楚南察瀨湖而野江東鮑氏註云察猶治也
楚有而治之以江之東為野此言楚亂有唐昧之難
而能得越地以名滑亂之也然鮑註瀨湖乃以為南
陽之屬殆非也南陽未嘗屬越又與江東全不相近

正謂漂陽之瀨水明矣

史記伍子胥去楚入宋奔鄭適晉還鄭奔吳橐載而出
昭關未至吳而疾止中道乞食張勃曰子胥乞食處
在丹陽漂陽縣案昭關在今和州含山縣北十八里
正當孔道自昭關趨漂陽甚近也

漢漂陽長潘乾元貞校官碑靈帝光和四年所立時歲
在辛酉杜少陵所謂骨立通神者蓋此類也石淪於
固城湖中紹興十三年癸酉漂水尉喻仲遠得之輦

置聽事之側蓋相距九百六十二年矣時時見光采
弓兵宿直或以褻衣頓於跌上必夢大龜逐而齧之
乾道戊子有官告院吏出職為尉顧碑字多闕蝕以
為無用且厭人之來呼隸史曹彥與謀將沉之宅後
廢治內一寓客素好古為尉所敬聞其說往詰之尉
慙謝而止邑宰陳容之為徙諸縣圃作屋覆焉至辛
卯歲金陵守作文一篇欲識石陰遣匠來甬鐫兩字
遭碎屑激入目旋易它匠皆然竟不能施工

夷堅志

校官碑長樂陳長方記曰兩漢石刻多在關中東南所
存無幾吾友喻居中尉漂水得後漢光和中漂陽長
潘君碑於固城湖之傍漂水故漂陽也風雨摧剥幾
不可讀居中譯以今字四百餘其不可讀者尚數十
因舉而置之官舍庶幾傳遠老杜八分歌稱苦縣光
和尚骨立蓋苦老子廟碑是光和中八分書老杜稱
以為最古以是校之未知先後

晉簡文帝命曲安遠為句容令吏部尚書王彪之執不

從曰句容近畿三品佳邑豈可任卜術之人無才用

者耶

王彪之傳

賀循為太子舍人時廷尉張閭住小市將奪左右近宅以廣其居乃私作都門早閉晏開人多患之訟於州府皆不見省會循出連名詣循質之循曰見張廷尉當為言及聞聞遽毀其門詣循致謝其為世所欽服

如此

晉本傳

陸龜蒙云予為兒時在溧陽聞白頭書佐言孟東野貞

元中以前秀才家貧受溧陽尉溧陽昔為平陵句縣
南五里有投金瀨瀨南八里許道有故平陵城周千
餘步基址坡陀裁高三四尺而草木勢甚盛率多大
櫟合數人抱叢篠蒙翳如塢如洞地窪下積水沮洳
深處可活魚鱉葦大抵幽邃岑寂氣候古澹可喜除
里民樵罩外無入者東野得之忘歸或比日或間日
乘驢後小吏驀投金瀨一往至則蔭木櫟隱叢篠坐
於積水之旁苦吟到日西而還爾袞袞去曹務多廢

弛令季操下急不佳東野之為立白上府請以假尉
代東野分其俸以給之東野竟以窮去吾聞淫畋漁
者謂之暴天物天物不可暴又可挾摘刻削露其情
狀乎使自萌卵至於槁死不能隱天能不致罰耶

洪內翰邁嘗言古今忠臣義士其名載於史冊者萬世
不朽然有不幸而泯沒無傳者南唐後主時有淮人
李雄當王師弔伐出守西偏不遇其敵雄以國城重
圍不忍端坐遂東下以救之陣於溧陽與王師遇父

子俱沒諸子不從行者亦死他所死者凡八人李氏
訖亡不霑褒贈其事僅見於吳唐拾遺錄項嘗有旨
合九朝國史為一書他日史肯為列之於李煜傳庶
足以慰斯人於泉下

南唐將亡數年前修昇元寺殿掘得古記視之詩也其
辭曰莫問江南事江南事可憑抱雞昇寶位趨犬出
金陵子建居南極安仁秉夜燈東隣嬌小女騎虎踏
河水王師以甲戌渡江後主寔以丁酉年生曹彬為

大將列柵城南為子建也潘美為副將城陷恐有伏
兵命卒縱火即安仁也錢俶以戊寅年入朝盡獻浙
右之地

江南保大中浚秦淮得石志案其刻有大宋乾德四年
凡六字他皆磨滅不可識令諸儒參驗乃輔公祐反
江東時年號後太祖受命國號宋改元乾德江左始
衰弱豈非威靈將及而符讖先著也

南唐將亡前數年宮中人採薔薇水染生帛一夕忘收

為濃露所漬色倍鮮翠因令染坊染碧必經宿露之
號為天水碧宮中競服之識者以為天水趙之望也
開寶中新修營得一石記凡數百字隸書從頭云從
他痛從他痛如此連寫至末云不為石子盡更書千
萬箇從他痛從他痛不知其識也未幾王師渡江云
金陵才士鍾輻少年氣豪一老僧相之曰君及第則家
亡時樊若水愛輻之才以女妻之及宴爾應詔洛中
果中甲科由是狂放攜一女僕青箱過華州蒲城其

宰乃故人延留累日一夕盛暑追涼縣樓痛飲而寢
是夕夢樊氏出一詩示生怨責頗深詩云楚水平如
練雙雙白鷺飛金陵幾多地一去不言歸生夢中愧
謝戲答一篇曰還吳東下過蒲城樓上清風酒半醒
想得到家春已暮海棠千樹必凋零既寤因趣裝歸
至米石渡青箱心疼數刻暴卒生忽忽藁葬於一新
墳之傍泊至家門巷空間妻妾亡數月詢之親鄰樊
亡之日乃夢於縣樓之夕也青箱葬處乃樊之塋地

也不植他樹惟海棠數株葉萼凋謝正符詩意鍾歎
曰浮屠老僧之說信哉竟不仕隱於鍾山著書養氣
年八十餘

陳喬仕江南為門下侍郎掌機密後主之稱疾不朝喬
預其謀及王師問罪誓以固守時張洎為喬之副嘗
言於後主苟社稷失守二臣死之城陷喬將死後主
執其手曰當與我同北歸喬曰臣死之即陛下保無
恙但歸咎於臣為陛下建不朝之謀斯計之上也掣

其手去入視事廳內語二僕曰共縊殺我二僕不忍
解所服金帶與之遂自經後主求喬不得或謂張洎
曰此詣北軍矣喬既死從吏撤扉而瘞之明年朝廷
嘉其忠詔改葬後見其屍如生而不僵髭髮鬱然初
求屍不得人或見一丈夫衣黃半臂舉手影自南廊
而過掘得屍以右手加額上如所覩者

金陵人胡恢博物強記善篆隸臧否人物坐法失官十
餘年潦倒貧困赴選集於京師是時韓魏公當國恢

獻小詩自達其一聯曰建業關山千里遠長安風雪
一家寒魏公深憐之令篆太學石經因此得復官任
華州推官而卒

徐常侍鉉仕江南日嘗直澄心堂每幙被入直至飛虹
橋馬輒不進裂鞍斷轡筆之流血掣韁却立鉉貽書
於餘杭沙門贊寧答云下必有海馬骨水火俱不能
毀惟漚以腐槽隨毀者乃是鉉斲之二丈餘果得巨
獸骨上脰可長五尺膝而下長三尺腦骨若梁柱積

薪焚三日不動以腐糟漚之遂爛焉

南唐後主留心筆札所用澄心堂紙李廷珪墨龍尾石
硯三物為天下之冠自李氏亡龍尾石不復出景祐
中校理錢僊芝知歙州訪得其所乃大溪也李氏嘗
患溪深不可入斷其流使由他道李氏亡居民苦溪
之回遠導之如初而石乃絕僊芝移溪還故道石乃
復出遂與端溪並行

元豐中王荊公在金陵東坡自黃北還日與公游盡論

古昔文字公歎息謂人曰不知更幾百年方有如此
人物東坡渡江至儀真和游蔣山詩寄金陵守王勝
之益公亟取讀至峰多巧障日江遠欲浮天乃撫几
曰老夫平生作詩無此二句又在蔣山時以近製示
東坡坡云積李兮縞夜崇桃兮炫晝自屈宋沒世曠
千餘年無復離騷句法乃今見之荆公曰非子瞻見
諛自負亦如此然未嘗為俗子道也

余為兒童時嘗聞祖母集慶郡夫人言江南有國日有

縣令鍾離君與鄰縣令許君結姻鍾離女將出適買一婢以從嫁一日其婢執箕箒治地至堂前熟視地之窄處惻然泣下鍾離君適見怪問之婢泣曰幼時我家父於此穴地為毬窩道我戲劇歲久矣而窄處未改也鍾離驚曰而父何人婢曰我父乃兩政前縣令也身死家破我遂落民間而更賣為婢鍾離君遽呼牙儈問之復質牙老更具得其實是時許令子納采有日鍾離君遽以書抵許令而止其子且曰吾買

婢得前令之女吾特憐而悲之義不可久辱當以吾女之奩篚先求壻以嫁前令之女也更俟一年別為吾女營辦嫁資以歸君子可乎許君答書曰蘧伯玉恥獨為君子君何自專仁義願以前令之女配吾子然後君別求良輿以嫁君女於是前令之女卒歸許氏祖母語畢歎曰此等事前輩之所常行今則不復見矣余時尚幼恨不記二令之名姑書其事亦足以激天下之義矣

興化尉胡滋其妻宗室女也自言夢人衣金紫云王待制來為夫人兒妻尋產子介甫聞之自京師至金陵與夫人常坐於船一簾下見船過輒問得非胡尉船乎既而得之舉家悲喜亟撫視涕泣遺之金帛不可勝數邀與俱還金陵滋言有捕盜功應詣銓求賞介甫使人為營致除京官留金陵且半年欲勾其兒其母不可乃遣之

金陵道士章齊一善為詩好嘲詠一被題目即日傳誦

人皆畏之凡四百餘篇曲盡其妙後得疾嚼舌而死
建炎車駕南渡百僚倉皇渡江舟人乘時射利停橈水
中每渡一人必須金一兩然後登船是時葉宗諤為
將作監逃難至江滸而寔不攜一錢徬徨無措忽覩
婦人於其側美而艷語葉云事有適可者妾亦欲渡
江有金釵二隻各重一兩宜濟二人而涉水非女子
所習公幸負我以趨葉從之且舉二釵以示篙師肯
首令前婦人伏於葉之背而行甫扣船舷失手婦人

墜水而沒葉獨得逃生悵然以登南岸葉後以直龍
圖閣帥建康其家影堂中設位云揚子江頭無姓名
婦人豈鬼神託此以全其命乎

陳侍郎巖肖云紹興初予之官建康艤舟溧陽郵亭見
壁間題云十年棄微官歸來事却掃扁舟訪安期要
覓如瓜棗不知膏粱珍惡食時自好田園苦無多生
理何草草濁酒時一樽孤斟從醉倒然不著名氏不
知何時所作觀其言淡而旨遠決非汨沒名利而不

知返者也

溧陽豪民吳璋以財橫鄉曲非特外人畏之其家子弟亦甚嚴憚每坐堂上則無敢過其前必先穴壁覘窺伺璋不在方敢入弟十九郎者因窺隙見金紫人向堂立後有服朱綠數人少長儼列驚異之疾走入門乃無所覩私竊自喜以為家慶殊未艾既而璋以不法為邑丞龔濫所治至於竄流遠方弟亦連坐黥徙袁州家貲皆估籍劉侍郎岑買其居緣居室之故為

請袁守免其弟歸因得服役門下適劉當歲除享祀
偶於壁隙窺之金朱綠袍恍然曩日所見者始以語
人

碧服周先生者常州人以善相游公卿間劉侍郎致仕
寓居溧陽周往從之嘗從容薄暮起曰侍郎明日有
隕墜敗面之厄劉曰當來共食以驗不然當罰爾曰
定矣旦未及食鄰家失火劉倉卒奔避礙於戶限仆
地面傷焉其他大率類此

劉侍郎以先世葬烏程之杼山故自號杼山居士杼山
曾祖述字孝叔熙寧中為御史知雜以忤荆公出知
江州溫公折簡與孝叔有道勝名立之語杼山既居
漂陽乃以道勝名其堂

淳熙十一年漂陽倉斗子坐盜官米黥配而籍其家得
草書二軸題云庚申歲書其名權花押正如一劍之
狀蓋鍾離翁也其詞云露滴紅蘭玉蒲畦間拖象屐
到峰西但令心似蓮花潔何必身將槁木齊古塹細

香紅樹老半峯殘雪白猿啼雖然不是桃花洞春至
桃花亦蒲溪李粹伯跋之曰字畫放逸有翔龍舞鳳
之勢脫去尋常畦逕非得於心而應於手者不能爾
飄然神僊風度固有所本云真本藏於建康府治軍
資庫絹素標飾處皆斷裂獨字畫不動庚申歲者豈
非藝祖創業建隆元年乎

洪輯居溧陽縣西寺事觀音甚敬幼子佛護病痰喘醫
不能治凡五晝夜不乳食證危甚呼醫杜生診視之

杜曰三歲兒抱病如此雖盧扁復生無如之何矣輯
但憂泣辦凶具而其母以嘗失孫愁悴尤切輯益窘
懼投哀請禱於觀音至中夜妻夢一婦人自後門入
告曰何不令服人參胡桃湯覺以語輯洒然悟曰是
兒必活此蓋大士垂教耳急取新羅參寸許胡桃肉
一枚不暇剝治煎湯灌兒一蜺殼許喘即定再進遂
得睡明日以湯浸去胡桃皮取淨肉入藥與服喘復
作乃只如昨夕法治之信宿有瘳此藥不載於方書

蓋人參定喘而帶皮胡桃則斂肺也

溧陽甓橋巫能以異法治骨鯁雖與被鯁者相去遠或不見其人亦可療淳熙九年長巷村人王四因食鵝遭鯁三日不能下飲食盡隔勢且死遣子持錢詣巫巫即於竈內取灰篩布地上炷香焚經誦呪召神結印次以葦筒作小犁狀耕灰中云此骨甚深凡耕至一再筒中忽微有聲亟傾注水盥間乃驚翅骨也甓橋距長巷四十里王氏子還家父平復已半日矣其

病之淺者一犁即愈云

建炎初有婦人題黃連步接官亭之壁云妾鄱陽人也
女工之外從事詩禮不幸嚴霜下墜泰山其頽飄泊
一身所適非偶薰蕕同器情何以堪昨浮家洞庭怒
帆一張良人條為鬼錄吁臣不事二主女不事二夫
其奈何哉偶攜稚子來登客亭感時傷心遂成小絕
知我者其天乎詩云故里蕭條一望間此身飄泊歎
空還感時有恨無人說愁斂雙蛾對暮山

聖湯延祥溫湯元序金陵屬邑溧水溧陽舊多蠱毒丞
相韓滉之為浙西觀察也欲更其俗絕其源終不可
得時有僧住竹林寺每絹一疋易藥一圓遠近中蠱
者多獲全濟值滉小女有惡疾浴於鎮之溫湯即愈
乃盡捨女之粧奩造浮圖廟於湯之右謀名僧以藏
寺事有以竹林市藥僧應之滉欣然迎置且求其藥
方久之僧始獻於是其法流布仍刊石於二縣之市
唐末喪亂石不復存而溫湯之寺至今在焉鎮之大

族夏氏世傳其法藥以溫湯為名誌其所自也溫湯

元方五月初桃皮末

二錢生用

盤螫末

一錢先以麥麴炒去翅足

大戟

末

二錢生用

右三味以米泔淀為圓如棗核形如中一切

蠱毒食前用米泔下一圓修合時於淨室中切忌婦

人孝子猫犬見崇寧間住持僧智淳得其方於府帥

曾氏家

南唐李後主獵青龍山一牝狙觸網見主雨淚稽顙屢指其腹主戒虞人保守之是夕誕二子還幸大理寺

親錄囚繫一大辟婦以孕在獄未幾產二子煜感牝狙之事罪止於流其山去城東二十五里

溧水縣東南二十五里有烏鯉廟昔民有女感黑龍於田野歸而有娠後產鯉魚投於水中復能變化隨母所後乘雲而去母亡每春時必來墳所鄉人因立廟祠焉

開寶七年南唐後主金陵苑囿中鹿忽一旦人語牧者叱之鹿亦叱牧者曰明年今日汝等俱為鬼物苑囿

荒涼焉能拘我明年王師渡江牧者俱死關敵苑囿亦廢矣

裴長史新羅國人忘其名後主朝行建州長史開寶八年王師攻金陵未下建州守查元方知長史善伎術進赴金陵五月路由歙州長史託疾不行密告刺史龔慎儀監軍軫鎬曰有狀託以附奏言金陵事者五一金陵立春節後出災謚寧無事二潤州不過九月當陷三朱令贇舟師氣候不過池州四江州血氣覆

城明年春末夏初血塗原野五大朝明年十月有大喪後皆如其言

杜秋娘李錡妾也錡滅籍入宮有寵於景陵後賜歸故鄉杜牧過金陵為之賦詩牧謂秋為金陵女國史補本事詩云李錡之擒婢配掖庭者曰鄭曰杜杜名秋娘建康人也有寵於穆宗穆宗即位以為漳王傅母太和中漳王得罪國除詔賜秋歸老故鄉中書舍人杜牧為詩以唁之

詩云京江水清滑生女白如脂其間杜秋娘不勞朱粉施老澤即山

過	盡	渡	載	削	畫	戲	祿	子	慶	仗	重	寵	子	叛	鑄
聞	仰	舟	似	秋	神	稍	金	壯	銅	獨	間	窈	盼	秋	後
之	天	人	夢	放	秀	出	盤	髮	雀	賜	捻	窈	盼	亦	庭
為	知	爭	復	故	射	舞	犀	綠	分	辟	紫	復	獨	紅	千
歛	問	得	疑	鄉	朝	雞	鎮	縷	香	邪	簫	融	依	淚	蛾
款	誰	知	非	歸	暉	奇	帷	畫	悲	旗	吹	怡	依	滋	眉
自	寒	歸	潼	觚	一	嶄	長	堂	雷	歸	莓	月	椒	吳	秋
古	衣	來	關	稜	尺	嶄	揚	授	音	來	苔	上	壁	江	持
皆	一	四	識	拂	桐	整	射	傳	後	煮	夾	白	垂	落	玉
一	貫	鄰	舊	斗	偶	冠	熊	姆	車	豹	城	壁	錦	日	竿
貫	素	改	吏	極	人	珮	館	天	遠	胎	路	門	幕	渡	飲
變	夜	茂	束	回	江	侍	武	人	事	饜	南	桂	鏡	岸	與
化	借	苑	髮	首	充	宴	帳	親	往	飫	苑	影	奩	綠	唱
安	鄰	草	已	尚	知	生	弄	花	落	不	雁	涼	蟠	楊	金
能	人	菲	如	遲	自	瑤	啞	捧	花	能	初	參	蛟	垂	縷
推	機	菲	絲	遲	欺	池	啞	持	時	飴	飛	差	螭	聯	衣
夏	我	清	却	四	王	眉	漸	虎	燕	咸	紅	金	低	裾	白
姬	昨	血	喚	朝	幽	宇	拋	晴	謀	池	粉	階	鬟	見	首
減	金	灑	吳	三	茅	儼	竹	珠	得	昇	羽	露	認	天	
雨	陵	不	船	十	土	圖	馬	絡	皇	日	林	新	新		

國述作巫臣妻西子下姑蘇一舸逐鴟夷織室魏豹
俘作漢太平基誤置代籍中兩朝尊母儀光武紹高
祖本係生唐兒珊瑚破高齊作婢春黃縑蕭后去揚
州突厥為闕氏女子固不定士林亦難期射鈎後呼
父釣翁王者師無國要孟子有人毀仲尼秦因逐客
令柄歸丞相斯安知魏齊首見斷廁中屍給喪踰張
革廊廟冠我危珥貂七葉貴何妨戎虜支蘇武却生
還鄧通終死饑主張既難測翻覆亦其宜地盡有何
物天高復何之指何為而捉足何為而馳耳何為而
聽目何為而窺已身不自曉此外何思惟因傾一樽
酒題作杜秋詩愁來
獨長詠聊可以自怡

李珣字溫叔都官外郎之幼女也八歲能作詩後適江
夏人王常同泛舟射利江湖間婁徹為江州清風亭

記常方歎美珣曰未之盡也何不云好山綠水萬里
有盡處清風明月千古無老時一日舉其文示徹徹
卒用其言為破題不久常死珣溺舟於三山磯下後
三日尸忽出於水中土人異之為立廟熙寧中都山
張芝過廟作三絕焚於廟中

一云風軟潮生江水平
遙峯隱隱漫寒青自從

香骨沉波底獨我為詩弔爾靈二云軋軋櫓聲離遠
浦瀟瀟帆影落寒濤三云愁慙酒陳佳果將此深心慰
寂寥三云江雨初晴遠岸低心因啼鳥隄既夜一青
思歸爾如會我題詩意魂夢相求一處飛
衣名云娘子奉俟久矣芝曰娘子為誰青衣曰早來

獻詩與誰耶芝乃悟見一婦人謂芝曰早來佳章欲
託以夢寐是或不能盡所懷故求面見妾溺此
時水官令賦詩及校九江會源錄一夕而畢水官大
悅令江神出其尸顯其靈今有祠在此血食於人謝
子之詩意所不敢當答以詩

梅天半霽江水漾水搖
花影紅蕩漾東風拋雨

過江西截江一瞬生銀浪閭然不見鷗鷺飛漁唱四
沉煙暝蕩忽然晴霽碧雲濶水色天光月下上柳風
和軟浪無聲客櫓嘔軋中流鳴兩岸沙頭拾翠女嬉
笑攜手相將行秋入空江源水靜澄流一碧如寒鏡
遠帆滅沒入雲中菱唱微茫晚風暝西風脫木露三
山隱隱樵居亂石間霜猿哀落巖前月杜宇枝間更

啼血蓬窗風緊客衣單中夜危腸幾欲絕我本名家
閨中女聘得良人共途路相將雲水二十年所得歡
心亦無數豈期天禍及一身夫死身沉大江去猛風
吹雲無定蹤盡日陰愁難得雨秋高水冷白骨寒孤
兒稚女歸何處因公遺我白玉篇慰此窮泉
生和氣明朝倦舸宿何州回首寒江煙雨暮芝見詩

嘆賞久之俄出白金二百星贈芝曰煩礮一石載妾
前事亦有奉報芝受其金送芝出幄則已五鼓矣芝
後因循不為立石舟再過三山磯下幾至傾覆是夕
又夢其女深詬責之事見翰林名談

晉譙閔王承遭王敦之難其子無忌以年小獲免咸和

中無忌拜散騎侍郎累遷屯騎校尉中書黃門侍郎
江州刺史褚裒當之鎮無忌及丹陽尹桓景等餞於
板橋時王廙子丹陽丞耆之在坐無忌志欲復讐拔
刀將手刃之裒景命左右救捍獲免御史中丞車灌
奏無忌欲專殺人付廷尉科罪成帝詔曰王敦作亂
閔王遇禍尋事原情今王何責然公私憲制亦已有
斷王當以體國為大豈可尋繹由來以亂朝憲主者
其申明法令自今以往有犯必誅於是聽以贖論

晉元帝渡江隨帝有王離妻者洛陽人將洛陽舊火南渡自言受道於祖母王氏傳此火并有遺書二十七卷臨終使行此火勿令斷絕火色甚赤異於餘火有靈驗四方病者將此火煮藥及灸諸病皆愈轉相妖惑官司禁不能止及季氏死而火亦絕時人號其所居為聖火巷在今縣東南三里禪衆寺直南出御街又齊武帝末年先是匈奴中謠言云赤火南流喪南國於是匈奴始規為寇帝方患而憂之是歲果有沙

門從北來齋此火而至火色赤於常火云可治疾貴
賤爭取之多得其驗二十餘日京師咸云聖火詔使
吏澆滅之而民亦有竊蓄者治病先齋戒以火炙桃
板七炷而疾愈吳興丘國賓竊還鄉邑邑人楊道慶
虛疾二十年形容骨立依法炙板一炷即痊是月武

帝崩

建康寔
錄注

愍帝建興五年春正月琅邪王出師路北躬環甲冑移
檄天下徵兵時有玉冊見於臨安白玉麒麟神璽出

於江寧其文曰長壽萬年日有重暈皆以為中興之象

國史纂異云王羲之告誓文今之所傳即其藁本不具年月日其真本維永和十年三月癸卯朔九日辛亥而書亦真開元初潤州江寧縣瓦官寺修講堂匠人於鴟吻竹筒中得之與一沙門至八年縣丞李延業求得上岐王以獻便留內不出王家失火圖書悉為灰燼此書亦見焚矣

張舜民芸叟曰李後主雜記數千言德慶堂題榜大字如截竹木小字如聚鍼丁似非筆迹所為者歐陽永叔謂顏魯公書正直方重如其為人若以書觀李後主可不謂之倔强丈夫哉然亦何柔弱骯髒之甚也孔子所謂以貌取人失之子羽聖人親見其面猶不能知其心況以字畫揆人者哉

德慶堂字刻在清涼寺今存

西清詩話曰自古文人雖在艱危困踣之中不忘於述作蓋性之所嗜雖鼎鑊在前不卹也況下於此者乎

後主在圍城中猶書長短句未就而城破所謂櫻桃
落盡春歸去蝶翻金粉雙飛子規啼月小樓西曲欄
珠箔惆悵卷金泥門巷寂寥人去後望殘煙柳低迷
嘗見殘藁點染晦昧心方危窘意不在書耳

昔黃太史有跋王荊公書陶隱居墓中文云熙寧中金
陵丹陽之間有盜發墓得隱起塋於塚中識者買得
之讀其書蓋山中宰相陶隱居墓也其文尤高妙王
荊公常誦之因書於天慶觀齋堂壁間黃冠遂以入

石子常欲摹刻於焚道有李祥者欣然磐石來請斯
文既高而王荊公書法似晉宋間草書此固多聞廣
見之所欲得也

今刻石江東潛廨

晉戴安道年十歲在瓦官寺畫王長史見之曰此童非
徒能畫亦終當致名但恨吾老不見其盛耳

見世說新語

顧愷之建康寔錄注云京師寺記興寧中瓦官寺初置
僧衆設會請朝賢鳴刹注疏其時士大夫無有過十
萬者顧愷之字長康直打刹注一百萬長康素貧時

以為大言後寺成僧請勾疏長康曰宜備一壁遂閉
戶往來一百餘日畫維摩一軀工畢將欲點眸子謂
寺僧曰第一日開見者責施十萬第二日開可五萬
第三日可任例責施及開戶光明照寺施者填塞俄
而果百萬錢也

蘇魏公題維摩像據畫體工用云顧
生首創維摩詰像有清羸示病之容

隱凡忘言之狀陸探微張僧繇效之終不能及至唐
寺廢杜牧之為池州刺史道過金陵歎其將圯募工
捐寫十餘本遺好事者其一乃汝陰太守某人也不
能攜去至今置於州廨丞相臨淄公鎮潁日嘗語從
事鏡石以記其始末嘉祐壬寅予領郡事暇日數取
以觀之案長康晉人故所畫服飾器用皆當時所尚

其意態位置非常畫之比也杜本已為後人竊取今
所存者蓋再經謄搨矣而氣象超遠髣髴如見當時
之人物已可愛也況牧之所傳乎況長康之真跡乎
韻語陽秋云苻經兵火壁既不存而畫亦不可得見
往歲京口都潔聖與來為建康總領詢維摩不存之
因寺僧莫能答因語之曰某守南雄嘗有人示石碣
云唐會昌中杜牧嘗寄瓦官維摩摹本於陳頴張彥
遠刻於郡齋某因求頴之本又刻於南雄尚有墨本
在篋笥以付予宜刻之戒壇庶幾舊物復歸而觀者
皆知顧筆神妙果如此亦可謂戒壇之異事僧乃刻
之

梁張僧繇名畫錄云金陵安樂寺畫四龍不點睛每云
點之則飛去人以為妄誕因請點之須臾破壁二龍

乘雲上天未點睛者見在初吳曹不興圖青溪龍僧
繇見而鄙之乃廣其象於龍泉亭其畫留在祕閣時
未之重至太清中震龍泉亭遂失其壁方知神妙又
天皇寺明帝所置也內有栢堂僧繇畫廬舍那佛及
仲尼十哲帝怪問釋門內如何畫孔聖僧繇曰後當
賴此爾及後代滅佛法焚天下寺塔獨以殿有宣尼
像乃不令毀

開寶中王師伐金陵所得府藏悉充軍中之賞有步卒

李貴徑入佛廟得建康人王齊翰所畫十六羅漢鬻
於市有富商劉元嗣以白金四百兩請售之元嗣入
郇復質於相國寺普滿塿主清教處及元嗣往贖並
為所匿訟於京師時真宗方尹京按證其事清教辭
屈乃出元畫為真宗嘉歎各賜白金十兩釋之後十
六日即位名曰應運國寶羅漢藏於祕府

聖宋名畫錄

艾宣金陵人工畫花竹翎毛孤標雅致別是風規敗草
荒榛尤長野趣又有昇州屬昭慶工佛像尤長於觀

音句容郝登以丹青自樂周文規能畫鬼神冕服車
器人物昇元中命圖南莊最為精絕江寧沙門已然
畫煙嵐晚景當時稱絕建康蔡潤善畫舟船及江湖
水勢曹仲元工畫佛道鬼神竺夢松工畫人物女子
宮殿臺閣顧德謙工畫人物劉道士工畫佛道鬼神

圖畫見
聞志云

王荊公晚年刪定字說出入百家語高而意深嘗自謂
平生精力盡於此書好書者從之請問口講手畫終

席幾至千餘字金華俞紫琳清老嘗冠禿巾衣埽塢
服抱字說遂荆公之驢往來法雲定林過八功德水
逍遙游亭之上龍眠李伯時曰此勝事不可以無傳

也遂畫以為圖

韻語陽秋曰京師學士院有燕侍郎
山水閣

五峰暮雲樓閣有閣

與此同後張天闕

遙望鍾山
東驂髣髴

山與閣

然身在畫圖中

景定建康志卷五十